



Semua daerah di Kedah dijangka terima hujan lebat hingga 30 Oktober

Oleh Zuliaty Zulkiffli - Oktober 23, 2023 @ 4:51pm

bhnews@bh.com.my

ALOR SETAR: Semua daerah di negeri ini dijangka mengalami hujan lebat disertai ribut petir pada sebelah petang bermula hari ini hingga 30 Oktober ini.

Pengarah Jabatan Meteorologi Malaysia (MetMalaysia) negeri, Muhammad Khalil Abd Aziz berkata, corak cuaca itu berikutan bermulanya Tempoh Peralihan Monsun yang dijangka bermula pertengahan September hingga November.

"Berdasarkan analisis kami, angin sepoi-sepoi dan angin boleh ubah akan berterusan di seluruh Semenanjung mulai 23 Oktober ini yang secara amnya membawa kepada ribut petir dan angin kencang.

"Bagi Kedah pula, semua daerah di negeri ini secara amnya dijangka mengalami hujan lebat dan ribut petir pada sebelah petang terutama di kawasan hulu dalam tempoh tujuh hari ini," katanya ketika dihubungi hari ini.

Muhammad Khalil turut menasihatkan semua orang awam untuk berada di dalam rumah dan mengelakkan renjatan elektrik sewaktu ribut petir untuk mengelakkan sebarang kemalangan.

Beliau berkata, kejadian petir yang kerap berlaku, hujan lebat, lonjakan air dan angin kencang berkemungkinan berlaku terutama di kawasan hulu, semua orang awam dinasihatkan supaya sentiasa peka dengan ramalan cuaca.

Sementara itu, Pengarah Angkatan Pertahanan Awam Malaysia (APM) negeri, Zairil Anuar Zulmuji berkata, pihaknya bersedia menghadapi sebarang kemungkinan bencana alam sepanjang tempoh berkenaan.

Beliau berkata, setakat ini seramai 1,100 anggota APM Kedah diarah berwaspada sepanjang masa, bersedia untuk ditempatkan dalam operasi menyelamat dan pengurusan bencana di seluruh negeri.

"Kami sudah mengadakan pertemuan dengan semua pegawai APM di negeri ini untuk membincangkan penyelarasan kami bagi menambah baik operasi pengurusan bencana kami di seluruh negeri.

"Selain itu, kami turut menyediakan 38 aset di darat serta 85 aset marin untuk menangani potensi bencana kali ini," katanya.

Zairil Anuar berkata, APM Kedah turut mengenal pasti 260 kawasan yang sering dilanda banjir membabitkan daerah Kubang Pasu, Kota Setar, Pendang, dan Pokok Sena, Baling dan Sik.

Beliau berkata, Kampung Iboi di Baling adalah antara lokasi berisiko tinggi untuk kejadian kepala air selain di daerah Yan.

"Kami melakukan persiapan yang sewajarnya dan akan melakukan operasi pemantauan secara berkala di kawasan berisiko tinggi ini terutama ketika hujan lebat," katanya.

Mengulas lanjut, beliau berkata, jumlah mangsa banjir di negeri ini sudah berkurangan berikutan tiga pusat pemindahan Sementara (PPS) di Sik sudah ditutup sepenuhnya hari ini.

"Sehingga kini empat daerah terjejas banjir kilat iaitu Sik, Pokok Sena, Bandar Baru, dan Padang Terap.

Bagaimanapun, setakat ini hanya dua PPS yang aktif iaitu dua di Pokok Sena manakala dua PPS di Sik sudah ditutup sepenuhnya, hari ini" katanya.